

Bunita discurso di Prome Minister Mike Eman dia 4 di mei

“Hopi a muri pa nos libertad. Tambe un Arubiano, Boy Ecury”



ORANJESTAD- Diamars 4 di mei 2010 nos a conmemora cu 65 aña pasa a yega un fin na e cueldadnan di Segunda Guerra Mundial. Masha hopi hende a sacrifica y a perde na bida pa awe nos por biba den libertad. Esaki tabata e mensahe cu por a wordo scucha na Hulanda y aki na Aruba diamars cu a pasa. Na Aruba tabatin un bunita ceremonia y hopi bon concuri dilanti e monumento di guerra, na unda soldanan di Savaneta Kamp a forma un guardia ceremonial. Gouverneur di Aruba sr.F.Refunjol, Presidente di Parlamento Andy Lee, Prome

Minister Mike Eman, ministernan Dowers y Oduber, miembronan di Parlamento y griffier, representante di Hulanda, miembronan di Mariniers Kazerne, alto funcionario di Polis, veteranonan y otro invitado tabata presente na e conmemoracion formal aki. Prome Minister di Aruba mr.Mike Eman a hiba un discurso conmovedor na e ocasion special aki. P’e ta hopi importante pa nos para keto riba un dia manera esun di 4 di mei. No solamente pa honra esnan cu a muri, pero tambe pa siña un les di pasado. El a conta con tres aña pasa riba un 4 di

mei e tabata para na Waaldorpsvlakte, un lugar den becindario di Den Haag. Na e sitio ey e Arubiano Boy Ecury a wordo tira mata. Para eynan hopi pensamiento a pasa den su cabes. Kico por a pone un Arubiano hoben di un isla encantador manera Aruba cu un futuro prometedor tuma e decision pa forma parti di e resistencia na Hulanda. E tabata conoce e riesgonan y asina mes a pone su bida na peliger, sabiendo cu dor di su apariencia diferente na di su compañeronan, e ta core mas riesgo cu nan. Tog el a tuma e decision y a paga esaki cu

e prijs mas haltu cu tin, cu su bida. Para na e sitio frieu ey na unda nan Boy Ecury a wordo mata, tur loke el a siña na scol en cuanto di e guerra y resistencia a haya un otro dimension. Na unda Boy a muri, sanger a wordo derama, pa awe nos por biba den libertad cu ta parce di ta algo masha comun. Prome Minister ta sigui su discurso bisando cu nos a bin hunto pa conmemora esnan cu a perde nan bida den gueranan y nos ta para keto na e horror, na e dolor y violencia cu a wordo comete contra hendenan inocente.